

ଫିଲିପ୍ପିନ୍ସମାନଙ୍କ ନିକଟକୁ ପାଉଲଙ୍କ ପତ୍ର ଫିଲିପିୟତ୍ ଗାର୍ରେ ପାଉଲ୍‌ରେ ଚିଠି ଫିଲିପିୟ ବଇ ବିଷୟରେ ଅଣ୍ଟୟ ପଦ୍

ଜିସୁ କ୍ରିଷ୍ଟନ୍ ଜନମ୍ ଆଦାନ୍ ଗାରେଗାରେ ୬୧ ଏଣ୍ଟକ୍ ପେକେ ପାଉଲ୍ ପିଲିପି ମଣ୍ଟୁଲିତ୍ ବିଶ୍ୱାସୀତ୍ ଗାର୍ରେ ଚିଠି ଲେକିମାତ୍‌ତଣ୍ଟ । ସମ୍ଭାବନା ପାଉଲ୍ ରୋମ୍‌ତାଗ୍ ବନ୍ଦି ମାନ୍ଦାନ୍ ଝେଲେ ଅଣ୍ଟ ଇଦ୍ ଚିଠି ଲେକିମାତ୍‌ତଣ୍ଟ ୧:୧୩ । ପିଲିପିୟ ଟାଝୁନ୍ ନାତ୍‌ମେ ମାନ୍ଦାନ୍ ମଣ୍ଟୁଲି ଗାର୍ରେ ଇଦ୍ ଚିଠି ଲେକା ଆସ୍‌ମାତ୍‌ତେ । ମାମ୍ ପ୍ରେରିତ୍ ବଇତାଗ୍ ଗାଲା ବେସ୍‌କେ ବିଷୟ ପିଲିପି ବଇ ବିଷୟରେ ପୁନ୍ଦେ ପାର୍‌ଦୁତାତ୍ । ପିଲିପି ମାକିଦୋନିଆ ରାଜ୍‌ଦାନୀ ଟାଝୁନ୍ ମାତ୍‌ତେ । ଇଦ୍ ମାକିଦୋନିଆତାଗ୍ ତିଆର୍ ଆତ୍‌ତେ ମୁନେତ୍ ମଣ୍ଟୁଲି ମାତ୍‌ତେ । ପାଉଲ୍ ନୁ ଗାଲା କାୟ୍‌ଲି ଇଦ୍ ମଣ୍ଟୁଲି ଆରାମ୍ ମାଡିମାତ୍‌ତତ୍ । ମେଣ୍ଟେ ଆଗେ ମାନ୍ଦାନ୍ ଝେଲେ ଅଣ୍ଟୟ ନାକେତ୍ ସେଙ୍ଗେ ଜଇଲ୍‌ତାଗ୍ ନେଃଏସ୍ ମାତ୍‌ତତ୍‌ପ୍ରେରିତ ୧୬ ।

ଆଦ୍‌ପାର୍‌ତେ ପାଉଲ୍ ଇଦ୍ ଚିଠି ଲେକାନାଗ୍ ନାଗେ ଉଦେଶ୍ୟ ମାତ୍‌ତେ । ଅଣ୍ଟ ବନ୍ଦି ମାନ୍ଦାନ୍ ବିଷୟ କେଞ୍ଜି ମଣ୍ଟୁଲିତେ ନାରୁଡ୍‌ଦାନ ଗୁଡ୍‌ପି ରହସ୍ ମାନନାଙ୍କ୍ ମଣ୍ଟୁଲିତିଙ୍କ୍ ଦନ୍ୟବାଦ୍ ଇଦାନ୍ ଉଦେଶ୍ୟ ନେଃଏସ୍ ଚିଠି ଲେକ୍‌ତଣ୍ଟ ୪:୧୦-୧୯ । ଅଣ୍ଟ ଗାଲା ତାନ୍ ବନ୍ଦି ଅବସ୍ଥା ପରିସ୍ଥିତି କେସ୍ ମଣ୍ଟୁଲିତେ ତିମତି ନୁ ଏପାପ୍ରଦିତତିଙ୍କ୍ ସୁପାରି ମାତ୍‌ତଣ୍ଟ, ବିଶ୍ୱାସୀତ୍ ବେଲା ଅଡ୍‌କିଂଙ୍କ୍ ମାନେମ୍ ଆସ୍ ନମସ୍କାର ମାତ୍‌ତତ୍‌ନୁ ଅନ୍ କେଲ୍‌ନାଙ୍କ୍ ସମ୍ମାନ୍ ଇଦ୍‌ତତ୍‌୨:୧୯-୩୦ ।

ବଇତ୍ ଲୋପେ ମାନ୍ଦାନ୍ ମୁକ୍ୟ ବିଷୟ

୧. ପିଲିପି ମଣ୍ଟୁଲିତିଙ୍କ୍ ପାଉଲ୍‌ରେ ନମସ୍କାର । ୧:୧-୨

୨. ପାଉଲ୍‌ରେ ପରିସ୍ଥିତି ନୁ ତାନ୍ ଚିନ୍ତେ । ୧:୩-୨:୩୦

୩. ବିଶ୍ୱାସୀ ନାରୁଡ୍‌କ୍ କ୍ରିଷ୍ଟିୟାନ୍ ଜିଝୁଣ୍ଟ ବାଦ୍‌କାନ୍ ସେଙ୍ଗେ ପାଉଲ୍‌ରେ ନିର୍ଦ୍ଦେଶ୍ । ୩:୧-୪:୯

୪. ପାଉଲ୍ ଦାନ ସେଙ୍ଗେ ଫିଲିପି ମଣ୍ଡଳିତିଙ୍କ ନମସ୍କାର ନୁ ଦନ୍ୟବାଦ କେତିତଣ୍ଡ । ୪:୧୦-୨୩

କାର୍ତ୍ତାନ୍ ନାରୁଡ଼, ସେଙ୍ଗେ ପାଉଲ୍‌ତେ ପ୍ରାର୍ଥନା

୧ ☆ଫିଲିପୀ ମଣ୍ଡଳିତେ ଦର୍ମଗୁରୁ, ସେବକିଡ଼, ନୁ କ୍ରିଷ୍ଟ ବିଶ୍ୱାସି
ସାରେତଡ଼କ୍, କ୍ରିଷ୍ଟ ଜିସୁନ୍ ଦାସ ପାଉଲ୍ ନୁ ତିମତିନ୍ ଚିଟି,

୨ ମାନ୍ ବାବାଲ୍ ଇଶ୍ୱର ନୁ ପ୍ରଭୁ ଜିସୁ କ୍ରିଷ୍ଟ ମିକିଂ ଅନୁଗ୍ରହ ନୁ ଶାନ୍ତି
ଇଞ୍ଜିଣ୍ଡ ।

୩ ବେସ୍‌ଦାମ୍ ନାନ୍ ମିକିଂ ଏକା ମାଡ଼ିତାନ୍, ନା ଇଶ୍ୱରତିଙ୍କ
ଦନ୍ୟବାଦ ଇଦ୍‌ତାନ୍,

୪ ସାରେଦାମ୍ ମିଇ ସେଙ୍ଗେ ପ୍ରାର୍ଥନା ମାଡ଼ାନ୍ ଖେଲେ ଖେଡ଼କେତେ
ପ୍ରାର୍ଥନା ମାଡ଼ାଟ୍;

୫ ବାତେଙ୍କ ମିୟାଦ୍ ବିଶ୍ୱାସ୍ ପ୍ରାୟ ଦିନାକିନେ କେ ନାନ୍ ମିକିଙ୍କ
ସୁସମାଚାରତାଗ୍ କାମ୍ ମାଡ଼ିତାନ୍ ।

୬ ଆଦିଙ୍କ ନାନ୍ ଇଦ୍ ବିଷୟତେ ନିଜାମ୍ ଯେ, ବେନ୍ ପ୍ରଭୁ ମିୟାଗେ
ଇଦ୍ ସାୟେ ପାଡ଼ୟି ଆରାମ୍ ମାଡ଼ତଣ୍ଡ, କ୍ରିଷ୍ଟ ଜିସୁନ୍ ଝାଦାନ୍ ଦିନାତେ
ଇଦ୍ ତେରାନ୍ ଯାକ ଅଣ୍ଡ ଆଦ୍ ମାଡ଼ିତନ୍ ।

୭ ମାଈଡ଼୍ ସାରେଦାମ୍ ନା ହୃଦୟତାଗ୍ ମିନ୍ଦେଡ଼ି; ଆଦିଙ୍କ ମିୟାଦ୍
ବିଷୟତେ ଇଦ୍‌ଲେକାମ୍ ଏକା ମାଡ଼ାନାଦ୍ ନାକିଙ୍କ ଚିକ୍ ଆଦ୍‌ତେ ।
ନାନ୍‌ନେ ସ୍ୱାଦିନ୍ ମାନ୍ଦାନ୍ ଖେଲେ ନୁ ଇଞ୍ଜେ ଇଦ୍ ବନ୍ଦି ଅବସ୍ଥାତେ
ସୁସମାଚାର୍ତ୍ତେ ପ୍ରତିଷ୍ଠା ନୁ ସୁରକ୍ଷା ସେଙ୍ଗେ ପାଡ଼ୟି ମାଡ଼ାନଙ୍କ ଇଶ୍ୱର
ନାକିଂ ବେନ୍ ସୁଯଗ୍ ଇଡ଼ତନ୍, ମାଈଡ଼୍ ସାରେତଡ଼୍ ଇଦ୍‌ନ୍ ଅଂଶି
ଆସ୍‌ମିନ୍ଦେ ।

୮ ମିଇ ସାରେତଡ଼୍ ସେଙ୍ଗେ ନାୟାଦ୍ ନାରୁଗେ ସ୍ନେହ ସ୍ୱୟଂ ଜିସୁ
କ୍ରିଷ୍ଟନାଗାଙ୍କ ନାନ୍ ପାଏମ୍ ଆଡ଼ତାନ୍ ଇଞ୍ଜ ବେସୁଙ୍କ ନାନ୍ କେତିତାନ୍,
ଇଦ୍ ନିଜାମ୍ ସଡ଼ । ଇଶ୍ୱର ଇଦିନ୍ ସାକ୍ଷି ଆଡ଼ତେ ।

୯ ନାନ୍ ପ୍ରାର୍ଥନା ମାଡ଼ିତାନ୍, ବେଦ୍‌ଲେକାମ୍ ମୁନେଙ୍କ୍‌ତାଦ୍ ବୁଦ୍‌ତେ
ନୁ ନ୍ୟାୟ ବିଚାରତେ ମିୟାଦ୍ ପ୍ରେମ ନାଗେ ତାଗାଙ୍କ ନାରୁଗେ ଆଦ୍‌ତେ

୧୦ ନୁ ମୀରଡ଼୍, ବେଲାନ ଲେକେଡ଼ ଶିକ୍ଷା ସାରେ ଏସ୍ତ ପାରଦ୍ଦିନ । ଆଲେକେ, ମିଡ଼୍, କ୍ରିଷ୍ଟନାଦ୍ ଝାଦାନାଦ୍ ଦିନାତେ ପବିତ୍ର ନୁ ନିନ୍ଦ୍ ଇଲ୍ଲେକ୍ସେନନି ମାନତିଡ଼୍,

୧୧ ଇଶ୍ବରତାଦ୍ ଗୌରବ୍ ନୁ ପ୍ରସଂଶା ସେଙ୍ଗେ ମିୟାଦ୍ ଜିହ୍ବୁଷ୍ ଜିସୁ କ୍ରିଷ୍ଟ ଇସ୍ମାନାନ୍ ସାରେଗୁଣତଡ଼୍, ବର୍ତ୍ତ୍ ଆଦତେ ।

ଗେଲ୍‌ସାନାଦ୍ ଆଡ଼ତେ କ୍ରିଷ୍ଟ

୧୨ ହୋ ଦାଦାନଡ଼ି ନୁ ଏଲ୍‌ସ୍ମିନଡ଼ି ! ନାନ୍ ମିରକିଂଙ୍କ କେଞ୍ଜ୍‌ପାନଙ୍କ ଇଚ୍ଛା ଯେ, ନା ସେଙ୍ଗେ ବାତେଏ ଗଟେମ୍ ଆଡ଼ତେ, ଆଦ୍ ସୁସମାଚାରତିଙ୍କ ସାରେପାକା ସାହାଯ୍ୟ ମାଡ଼ତେ ।

୧୩ ☆ପେରକେ, ଇଗେଡ଼ ସାରେ ପ୍ରାସାଦତଡ଼୍, ନୁ ବାଗାଡ଼ ସାରେତଡ଼୍, ପୁଡ଼ତଡ଼୍, ଯେ, କ୍ରିଷ୍ଟନାଦ୍ ଦାସ ଆସ୍‌ମାନନାଙ୍କ ନାନ୍ ଇଞ୍ଜେ ବନ୍ଦି ଲଡ଼ତାଗେ ମିନ୍ଦେନ୍ ।

୧୪ ବାତେଙ୍କ ଇଡ଼କେ ନାନ୍ ବନ୍ଦି ଆଡ଼ତାଙ୍କ ନାର୍‌ଗେ ଦାଦାନଡ଼ି ନୁ ହେଲ୍‌ସ୍ମ୍, ପ୍ରବୁନ୍ ସେଙ୍ଗେ ନାର୍‌ଗେ ବିଶ୍ବାସ୍ ଆଡ଼ତେ, ମେଣ୍ଡେ ଇଦ୍ ପେରକେ ଜାମିମେ ଇଶ୍ବରତେ ଗଟ୍ ପ୍ରଚାର ମାଡ଼ାନଙ୍କ ଅଡ଼ାଦ୍ ସାହସ ନାର୍‌ଗେ ଆଡ଼ତେ ।

୧୫ ଆଦଲେକାମ୍ ଅଡ଼ଆଗାଙ୍କ ବେସ୍‌ତୁଡ଼୍ ଗଲ୍‌କିନଡ଼୍, କପାମ୍ ଆସ୍ ପ୍ରଚାର କାମ୍‌ତାଗେ ଇଞ୍ଜେ କାଈଲ୍‌ତଡ଼୍, । ନୁ ବାଗାତଡ଼୍, ହୁଦୟତାଗ୍ ଆଦ୍ ମାଡ଼ତୁଡ଼୍ ।

୧୬ ପ୍ରେମତେ ମାୟଦିଙ୍କ ଅଡ଼କ୍ ଆଦ୍ ମାଡ଼ାନଙ୍କ ସାୟେଲ୍‌ଗିଡ଼୍ । ବାତେଙ୍କ ଇଡ଼କେ ଅଡ଼୍, ପୁଡ଼ତଡ଼୍, ଯେ, ଇଶ୍ବର ନାକିଂଙ୍କ ସୁସମାଚାରତେ ସୁରକ୍ଷା ଦାୟିତ୍ବ ଇଡ଼ତନ୍ ।

୧୭ ବାଗାତଡ଼୍, ବିଶ୍ବସ୍ତେ କ୍ରିଷ୍ଟନ୍ ଗଟ୍ ପ୍ରଚାର ମାଡ଼କଟ୍ ଆଜ୍ଞାଡ଼ାତାଦ୍ ଲେକାମ୍ ଆସ୍ ଆଦ୍ ମାଡ଼ତୁଡ଼୍ । ନାନ୍‌ନେ ବନ୍ଦିଲୋଡ଼ତାଗେ ମାନ୍ଦାନ୍ ଝେଲେ ନା ମାନ୍‌ତାଗେ ଅଦିକ୍ କଷ୍ଟ ଇଦାନଙ୍କ ଅଡ଼୍, ଆଦ୍ ମାଡ଼ତୁଡ଼୍ ।

୧୮ ଆଗେ ବାତେମିକା ଆଞ୍ଜ୍ ଆୟ୍‌ୟ । ସଡ଼ଡ଼ଦେଶ୍ୟ ଆୟି ବା ଆସଡ଼ ସାରେ ଆସ୍ ଆୟି, ବେନ୍ ମିକା ଉପାୟତେ କ୍ରିଷ୍ଟନ୍ ଗଟ୍ ପ୍ରଚାର ଆଡ଼କେ, ଆଗେ ନାୟାଦ୍ ଝେଡ଼କ୍ । ନାନ୍ ଝେଡ଼କା ମାଡ଼ମାନ୍‌ତାନ୍,

୧୯ ବାତେଙ୍କିକଙ୍କେ, ନାନ ପୁତ୍ତାନ ମିୟାଦ ପ୍ରାର୍ଥନା ନୁ ଜିସୁ କ୍ରିଷ୍ଟନ୍ ଆମ୍ବାତେ ସାହାୟ୍ୟ ତତ୍ତ୍ୱାନ ମୁକ୍ତି ଲାବ୍ ମାଡ଼ିତାନ ।

୨୦ ଜିଝେତାଗ୍ ବା ତଲାନାଗ୍, ନାୟାଦ ପାଡ଼ିୟିଦାଗ୍ ଗମାଡ୍, ମାଡକର୍ ସାରେ ସମୟତେ ନୁ ବିଶେଷତେ ଇଦ୍ ଦୁର୍ଦ୍ଦିନତେ ଶକ୍ତିତନ୍ ଆସ୍ ସାରେଲେକାମ୍ ବେଲାନ ନାନନେ କ୍ରିଷ୍ଟଙ୍କ୍ ଗୌରବ୍ତେ ମାଡ଼ିତାନ, ଇଦ୍ କେ ନାୟାଦ ଅଣ୍ଡୟକେ ଆଶେ ନୁ ଆକାଂକ୍ଷା ।

୨୧ ବାସ୍ତବିକ, ନା ଜିଝେତାଗ୍ କ୍ରିଷ୍ଟକେ ସାରରେ । ଆଦିଙ୍କ୍ ନା ପାକେ ତଲନାଦ୍ ଅଦିକ୍ ଲାବ୍ ଆଦତେ ।

୨୨ ଯଦି ଗେଲ୍‌ସି ମାଞ୍ଜି ନାନ ଅଦିକ୍ ସାୟେଡ୍ ପାଡ଼ିୟି ମାଡେ ପାର୍‌ଦତାନ, ଆଲେକେ ଜିଝୁନ୍ ବା ତଲନାଦ୍ ବାଡ଼ିକ୍ ହେଞ୍ଚିତାନ, ନାନ ଟିକ୍ ମାଡେ ପାର୍‌ଝନ୍ ।

୨୩ ନାନ ରେଣ୍‌ପାକେ ରେଣ୍ ଆକର୍ଷଣତେ ମିୟେ । ଇଦ୍ ଜିଝୁନ୍ ଓଡ଼ିସି କ୍ରିଷ୍ଟନ୍ ତତ୍ତ୍ୱାନ୍‌ନାୟାଦ ଗାଟି ଇଚ୍ଛା । ଆଲେକେ ଇଦ୍ ଲେକାମ୍ ।

୨୪ ମିଇ ସେଙ୍ଗେ ନାୟାଦ ଗେଲ୍‌ସି ମାନ୍‌ନ ଅଦିକ୍ ଦରକାଡ୍ ।

୨୫ ନାନ ଇଦ୍ ବିଷୟତେ ନିଜାମ୍, ଆଦିଙ୍କ୍ ନାନ ପୁତ୍ତାନ, ନାନ ଜିଝୁନ୍ ମାନତାନ । ମିୟାଦ ବିଶ୍ୱାସ୍ତେ ଅଦିକ୍ ନୁ ଝେଡ଼କ୍ ସେଙ୍ଗେ ନାନ ମିଇ ସାରେତଡ୍ ସାଙ୍ଗେ ମାନତାନ ।

୨୬ ଆଲେକେ, ମାଲଡ୍ ଜିଝେତାଗ୍ କ୍ରିଷ୍ଟନ୍‌ତଡ୍ କାଲି ମିକା ନା ତଡ୍ ଅଦିକ୍ ଗର୍ବ ଆଲ୍‌ସେ ପାର୍‌ଦତିଡ୍ ।

୨୭ ନାନ ମିଇକିଙ୍କ୍ ଉଡାନ ସେଙ୍ଗେ ଆଦାନଙ୍କ୍ ସମର୍ତ୍ତନ୍ ଆଦତେ ବା ଆୟୟ, ଇଞ୍ଜେ ବେଡ଼ୟାଦ୍ ବିଷୟ ଆଦୁଡ୍‌ତେ, ମିୟାଦ ଜିଝୁନ୍ ପ୍ରଣାଲି ବେଲାନ କ୍ରିଷ୍ଟନାଦ୍ ସୁସମାଚାର୍ ଲେକାମ୍ ଆଦତେ ନାନ ବେଲାନକି କେଞ୍ଜି ପାର୍‌ତାନ, ମିଡ୍ ଇଦ୍ ଲେକାମ୍ ଆସ୍ ଦୃଡ୍‌ତେ ନିଡ଼ିଡ଼ିଡ୍ ନୁ ଝେରଡ୍ ଆକାଂକ୍ଷା ଆସ୍ ସୁସମାଚାର୍ ବିଶ୍ୱାସ୍ ସେଙ୍ଗେ ଝେରଡ୍ ସଂଗ୍ରାମ୍ ମାଡ଼ିଡ଼ିଡ୍ ।

୨୮ ଶତ୍ରୁଡ୍ ନଡକ୍ ଝେରମାର୍, ସାହାସ୍‌ତେ ଡୁର୍‌ଗାଙ୍କ୍ ମାନୁର୍ । ଆଲେକେ, ଅଡ୍ ପୁନ୍‌ପାର୍‌ତଡ୍‌ୟେ, ଅଡ୍ ନିଜାମ୍ ହାରେମ୍ ଆଦତଡ୍, ନୁ ମିଡ୍ ଜିଡ଼ିଡ଼ିଡ୍, ବାତେଙ୍କ୍ ଇଡକେ ଇଶ୍‌ବରକେ ମିକିଙ୍କ୍ ପରିତ୍ରାଣ ମାଡ଼ିଡ଼ିଡ୍ ।

୨୯ ମାତର କ୍ରିଷ୍ଟନାଗେ ବିଶ୍ୱାସ୍ ମାଡାନାଦ୍ ଆୟ୍ଯୟ, ଅନ୍ ସେଙ୍ଗେ ଦୁଃକାମ୍ କଷ୍ଟ ମାଡାନ ସେଙ୍ଗେ ମିକିଂଙ୍କ କ୍ରିଷ୍ଟନାଦ୍ ସେବା ମାଡାନ ସେଙ୍ଗେ ସୁଜଗ୍ ଇଡ଼ତଣ୍ଡ ।

୩୦ ☆ଇଞ୍ଜେ ଇଦ୍ ଯୁଦ୍ ମିଡ୍ ନାୟାଦ୍ ପାଡ଼ୟି ଗ୍ରହନ୍ ମାଡ଼ତେ ପାରଦ୍ତିଡ୍ । ମୁନେଙ୍କ ମିଇଡ୍ ନାକିଂଙ୍କ ବେନ୍ ଯୁଦ୍ ମାଡାନାଦ୍ ଉଡ଼ିମାଡ଼ତିଡ୍, ଇଞ୍ଜେ ମିକା ନାନ୍ ଆଦ୍ ଯୁଦ୍ତାଗ୍ ମିକା ମିନ୍ଦେନ୍ ଇନା ମିଇଡ୍ କେଞ୍ଜିଡିଡ୍ ।

୨

କ୍ରିଷ୍ଟନାଦ୍ ନମ୍ରତା ନୁ ଆଦର୍ଶ

୧ କ୍ରିଷ୍ଟନ୍ତଡ୍ କାଈଲି ମାନ୍ଦାନ୍ ନଡ୍ ମିଇ ଜିଞ୍ଜେତାଗ୍ ଡାଟାମ୍ ଆଦତିଡ୍, ମେଣ୍ଡେ ଅନାଦ୍ ପ୍ରେମ ମିକିଂଙ୍କ ସାନ୍ତନା ଇଡୁଡ୍ । ମିଡ୍ ପବିତ୍ର ଆମ୍ବାତଡ୍ ସାହାସ୍ତେ କଷ୍ଟ ମାଡ଼ୁଡିଡ୍ ନୁ ନିଜେ ନିଜେ ଲୋପେ ମିୟାଦ୍ ପ୍ରେମ ନୁ ଦୟା ମିନ୍ଦେ ।

୨ ଆଦିଙ୍କ ନାନ୍ ମିକିଂଙ୍କ ଅନୁରଦ୍ ମାଡ଼ୁଡାନ, ଝେରଡ୍ ଚିନ୍ତାତଡ୍ ଆଲ୍ଲସି ମିକା, ଝେରଡ୍ ପ୍ରେମତେ କାଈଲି ମିକା ମନ୍ ନୁ ଆମ୍ବାତେ ଅଣ୍ଡୟ ଆସ୍ ମିଡ୍ ନାକିଂଙ୍କ ଆଦ୍ଲେକାମ୍ ସୁକାମ୍ତେ କାଟେମ୍ ଆୟ୍ଯୁଟ୍ ।

୩ ନିଜେଡ୍ ଉରଗାଡ୍ ସେଙ୍ଗେ ବା ଶକ୍ତି ତଅଡାନ ସେଙ୍ଗେ ବେନେମିକା ପାଡ଼ୟି ମାଡ଼ୁମାଟ୍ । ବାଡ଼ଇକ୍ ବାଗାତଡ଼କ୍ ନିଜେତଣ୍ଡ ଲେକାମ୍ ଆଲ୍ଲସି ନିଜେ ନିଜେ ସେଙ୍ଗେ ନମ୍ର ବ୍ୟବହାର୍ ମାଡ଼ାଟ୍ ।

୪ ମାତର ନିଜେଡ୍ ଉରଗାଡ୍ ସେଙ୍ଗେ ମାନେମ୍ ଆୟ୍ଯକଟ ବାଗାତଡ୍ ସେଙ୍ଗେ ମନ୍ ଆୟ୍ଯୁଟ୍ ।

୫ କ୍ରିଷ୍ଟ ଜିସୁନାଦ୍ ମାନ୍ହେର୍କା ବେଦ୍ଲେକାମ୍ ମାଡ଼ତେ, ମିୟାଦ୍ ଆଦ୍ଲେକାମ୍ ଆୟି ।

୬ ଅନାଗେ ସାରେଏକାମ୍ ଐଶର୍ଯ୍ୟ ଲେକାମ୍ ମାଇମାଡ଼କେ ମିକା, ଅଣ୍ଡ ଆଦ୍ ଅଦିକାର୍ତେ ଇଶ୍ୱରତଡ୍ ସାମାନ୍ ଆସ୍ ମାନ୍ଦାନଙ୍କ ଆଲ୍ଲସି ମାଡ଼ଝେ ମାଡ଼ତଡ୍ ।

୭ ଆଲେକେ ନିଜେଡ଼ ଇଚ୍ଛାତେ ଅନାଦ୍ ସାରେ ଓଡ଼ସି ମିକା ଦାସଲେକାମ୍ ଆଡ଼କେ । ନାରୁନ୍ ଲେକାମ୍ ଆସ୍ ନାରୁନ୍ ଲେକାମ୍ ତିଆର୍ ଆଡ଼କେ ।

୮ ଅଣ୍ଟ ବିନୟ ନୁ ନମ୍ ଆସ୍ ତଲାନ ଯାକ, କୁଶତାଗ୍ ତଲାନ ଯାକ ଗର୍ ପାଲନ୍ ମାଡ଼ତଣ୍ଟ ।

୯ ଆଦିନ୍ ସେଙ୍ଗେ ଇଶ୍ବର ଅଂକିଙ୍କ୍ ସାରେଡିଙ୍ଗ୍ ତେଙ୍ଗ୍ ପଡ଼ିୟେତାଗ୍ ପରୁ ତେଡ଼ତଣ୍ଟ ନୁ ବାଗାଡ଼ ସାରେତଡ଼ାଦ୍ ପେଦେରକିନାଗାଙ୍କ୍ ଲେକେଡ଼ ପେଦେର ଅଂକିଙ୍କ୍ ଇଡ଼ତନ୍ ।

୧୦ ଆଦିଙ୍କ୍ ସ୍ବର୍ଗ, ମର୍ତ୍ତ୍ୟ ନୁ ପାତାଲ୍ତେ ସାରେ ନାରୁଡ଼ ଅନ୍ ମୁନେ ଜିସୁନାଦ୍ ପେଦେରତେ ମର୍ମିଣ୍ଟା ଉଝୁସିତା ।

୧୧ ମେଣ୍ଟେ ସାରେ ଜିଝାକ୍ ଜିସୁ କ୍ରିଷ୍ଟକେ ପ୍ରବୁ ଇଞ୍ଜ କେସ୍ ମିକା ବାବାଲ୍ ଇଶ୍ବରତିଙ୍ଗ୍ ଗୌରବ୍ ମାଡ଼ିତିଡ଼ ।

ପୃତିବିତାଗ୍ ଝେସ୍ ଲେକାମ୍ ତନ୍ଦାଟ୍

୧୨ ଆଦିଙ୍କ୍ ପ୍ରିୟ ସାଙ୍ଗନଡ଼ି, ନାନ୍ ମିଇତଡ଼ ମାନ୍ଦାନ୍ ଝେଲେ ମିଇଡ଼ ବେଲାନ ସାରେଦାମ୍ ନାୟାଦ୍ ଆଜ୍ଞାଦିନାମ୍ ମାଡ଼ିତିଡ଼, ଇଞ୍ଜେ ନାନ୍ ମିୟାଗାଙ୍କ୍ ଯେକା ମାନ୍ଦାନ୍ ଝେଲେ ଅଦିକ୍ ବିଶ୍ବାସ୍ତେ ନାୟାଦ୍ ବାଦ୍ୟ ଆଦାନାଦ୍ ମିୟାଦ୍ ପାଡ଼ୟି । ମିୟାଦ୍ ମୁଲି ବେଲା ସାରେ ଆଦତେ, ଆଦିନ୍ ସେଙ୍ଗେ ଝେରସ୍ ନୁ ଝାଡ଼କାନ୍ ପାଡ଼ୟି ମାଡ଼ତ୍ ଆନୁର୍ ।

୧୩ ବାତେଙ୍କ୍ ମିୟାଦ୍ ନୁ ଅନ୍ଲେକାମ୍ ପାଲନ୍ ମାଡ଼ାନ୍ ସେଙ୍ଗେ ତିଆର୍ ନୁ ସମର୍ତ୍ତନ୍ ମାଡ଼ାନଙ୍କ୍ ସ୍ବୟଂ ଇଶ୍ବର ମିୟାଗେ ସାରେଦାମ୍ ପାଡ଼ୟି ମାଡ଼ତୁଣ୍ଟ ।

୧୪ ଆପଞ୍ଜି ବା ଗଲକ୍ ମାଡ଼କଟ୍ ସାରେ କାମ୍ ମାଡ଼ାଟ୍ ।

୧୫ ଆଲେକେ, ଇଦ୍ ଦୁନ ି ପେଇତାନାଦ୍ ନୁ ପାପ୍ ସାରେ ଜଗତ୍ତାଗ୍ ମିଡ଼ ଇଶ୍ବରତେ ପବିତ୍ର ମାର୍ ମାୟାକ୍ ଲେକାମ୍ ନିର୍ଦ୍ଦୋଷ୍ଟ ନୁ ପବିତ୍ର ଲେକାମ୍ ବାଦକେ ପାରତିଡ଼ ।

୧୬ ବାଗାଡ଼ତ୍ ପାକେ ଜିଝେଇଦାନ୍ ଗଟି ପ୍ରଚାର ମାଡ଼ାନ୍ ଝେଲେ ମିଇ ବାଗାତାଗ୍ ଝେସ୍ ଇଦାନ୍ ଉକାକିନ୍ ଲେକାମ୍ ଝେସ୍ ଆଦାନାଦ୍ ସାୟେ । ମିଡ଼ ଯଦି ଇଦ୍ ଲେକାମ୍ ଆଦତିଡ଼, “କ୍ରିଷ୍ଟନ୍ ଦିନାତେ,” ମିଇ ବିଷୟତେ ନାନ୍ ଗର୍ବ ମାଡ଼ିତାନ୍, ବାତେଙ୍କ୍ ଇଡ଼କେ ଇଗାଙ୍କ୍ ପ୍ରମାଣ୍

ଆଦିକାତ୍, ଯେ, ନାୟାଦ୍ ତାଲେ ଉଦ୍ୟାମ୍ ନୁ ପାଡ଼ନ୍ତି ଆଜ୍ଞାତାମ୍ ଆୟାୟ ।

୧୭ ଇଶ୍ବରତେ ଗର୍ତ୍ତେ ମିୟାଦ୍ ବିଶ୍ବାସ୍ ଲେକାମ୍ ବଲିଦାନତାଗ୍ ଆଲେକେ ବା ନାୟାଦ୍ ଜିହ୍ବନ୍ ନେତୁରଇସ୍ ତସିଦାଙ୍କ୍ ଆଦତେ । ଆଦିନ୍ ସେଙ୍ଗେ ନାନ୍ ଝେଡେକେ ନୁ ନାୟାଦ୍ ଇଦ୍ ଝେଡେକେତେ ମିଇ ତଡ଼୍ ମାଡାନଙ୍କ୍ ନାନ୍ ଇଚ୍ଛାମାଡୁନ୍ ।

୧୮ ମିଇଡ଼୍ ମିକା ଆଦଲେକାମ୍ ଝେଡକ୍ ମାଡାନାଦ୍ ସାରେ ନୁ ଆଦ୍ ଝେଡେକେତେ ନାକିଙ୍କ୍ ମିକା ତଡ଼୍ ମାଡାଟ୍ ।

ତିମତି ନୁ ଏପାପ୍ରଦିଡ଼୍

୧୯ ପ୍ରବୁନାଦ୍ ଇଚ୍ଛା ମାଡୁଡେ, ମିଇପାକେ ତିମତିଙ୍କ୍ ଯାପେ ରହତେ ପାରତାନ୍ ଇଞ୍ଜ ନାନ୍ ଆଶେ ମାଡୁଡାନ୍ । ଆଲେକେ, ମିୟାଦ୍ କବର୍ ସେଙ୍ଗେ ନାନ୍ ଉସାହିତ ଆଦତନ୍ ।

୨୦ ମାଡର୍ ଅନାଦ୍ ନା ଲେକାମ୍ ମାନ୍ ଏକା ନୁ ଅଣ୍ଟ ନିଜାମ୍ ମିଇ ସେଙ୍ଗେ ମାନ୍ଦେ ମିନ୍ଦେନ୍ ।

୨୧ ବାଗାଡ଼ ସାରେତଡ଼୍ ଜିସୁ କ୍ରିଷ୍ଟନ୍ ସେଙ୍ଗେ ମନ୍ଇଞ୍ଜକଟ ମାଡର୍ ନିଜେଡ଼ ଉରଗାଡ଼୍ ସେଙ୍ଗେ ଦାନ୍ଦେ ।

୨୨ ମିଡ଼୍ ପୁଡ଼ତିଡ଼୍, ତିମତି ବେଲାନ୍ ଅନାଦ୍ ଯୋଗ୍ୟତା ପ୍ରମାଣ ମାଡୁଡ଼ଣ୍ଟ, ବେଲାନ୍ ଅଣ୍ଟ ମେଣ୍ଟେ ନାନ୍ ମାର୍ ନୁ ବାବାନ୍ ଲେକାମ୍ ସୁସମାଚାର ପ୍ରଚାର ପାଡ଼ିୟିଦାଗ୍ କାଈଲିମିକା ସେବା କାମ୍ ମାଡୁଡୁମ୍ ।

୨୩ ନା ସେଙ୍ଗେ ବାଡ଼ ଗଟେମ୍ ଆଦାଙ୍କ୍ ଆଦୁଡ଼୍, ପୁନ୍ଦାନ୍ ଝେଲେ ନାନ୍ ଅଂକିଙ୍କ୍ ମିଇ ପାକେ ରତିତାନ୍ ଇଞ୍ଜ ଆଶେ ମାଡୁଡୁନ୍ ।

୨୪ ଆଦେଲେକାମ୍ ପ୍ରବୁନାଗେ ନାନ୍ ବିଶ୍ବାସ୍ ମାଡୁଡୁନ୍ ଯେ, ନାନ୍ ନିଜେ ଯାପେ ମାଈପାକେ ଝାଦେ ପାରତାନ୍ ।

୨୫ ନାୟାଦ୍ ପ୍ରେରିତ ପାଡ଼ିୟି ନୁ ଯୁଦ୍ଧତାଗେ ଜିତାନାଦ୍ ନୁ ମିୟାଦ୍ କେଡତାନ୍ ଲେକାମ୍ ନାକିଙ୍କ୍ ତଡ଼୍ ଆସ ଝାସମାନ୍ଦାନ୍ ଏପାପ୍ରଦିଡ଼୍ ମିକା ମିଇ ପାକେ ରଅତାନଙ୍କ୍ ମାନ୍ ମାଡୁଡୁନ୍ ।

୨୬ ଅଣ୍ଟ ମିକା ସାରେତଡ଼୍ ଉଡାନ୍ ସେଙ୍ଗେ ସୁକାମ୍ତେ ନୁ ମିଡ଼୍ ଅନାଦ୍ ରଗାମ୍ ଗର୍ କେଞ୍ଜି ମାନ୍ନାଙ୍କ୍ ଅଣ୍ଟ ଦୁଃକାମ୍ ।

୨୭ ମୁନେଙ୍କ୍ କଞ୍ଜ ଅଣ୍ଟ ରଗାମ୍ ଆସ୍ ଡଲାନ୍ ଲେକାମ୍ ଆସ୍ ମାଡୁଡ଼ଣ୍ଟ । ବାଡେଙ୍କ୍ଇକ୍ଟେ ଅଂକିଙ୍କ୍ ଇଶ୍ବର ଆଶ ବାଦ୍ ମାଡୁଡ଼ଣ୍ଟ ।

ମାତର ଅନ୍ ସେଙ୍ଗେ ଆୟୁୟ, ନା ସେଙ୍ଗେ ମିକା ଅନାଦ୍ ଆଗି ବାଦ୍ ମାଡାନଙ୍କ ନାକିଙ୍କ ଦୁଃକାମ୍ ତିପାଲ୍ ଆଡତାଙ୍କ ଇଞ୍ଜଣ୍ଡ ।

^{୨୮} ନାନ୍ ଅକିଙ୍କ ମାଇପାକେ ରଡତାନ୍ ସେଙ୍ଗେ ତିଆର, ବାଡେଙ୍କଇକେ ଅକିଙ୍କ ଉଡକେ, ମିଡ୍ ମେଣ୍ଡନ୍ୟାମ୍ ଝେଡକା ଆଦତିଡ୍ ନୁ ନାୟାଦ୍ ଦୁଃକାମ୍ ମିକା କମ୍ ଆଦତେ ।

^{୨୯} ଆଦିଙ୍କ ଝେରଣ୍ଡ କ୍ରିଷ୍ଟ ବିଶ୍ୱାସ୍ ଦାଦାନ୍ ଲେକାମ୍ ମିଡ୍ ଅକିଙ୍କ ଝେଡକେତେ ଗ୍ରହନ୍ ମାଡାର୍ ନୁ ଇଦ୍ ଲେକାମ୍ ସାରେ ଗୁଣତଡ୍, ନାରୁଡକ୍ ବଲ୍ଲି ମାଡାର୍,

^{୩୦} ବାଡେଙ୍କଇକେ ମିଡ୍ ନାକିଙ୍କ ବେନ୍ ସାହାୟ୍ୟ ଇଦେପାରୁଡିଡ୍, କ୍ରିଷ୍ଟନାଦ୍ ପାଡ୍ଯି ସିଦ୍ ସେଙ୍ଗେ ଅଣ୍ଡ ଆଦ୍ ନା ସେଙ୍ଗେ ମାଡାନଙ୍କ ଆଞ୍ଜି ନିଜେଡ୍ ଜିଝୁଣ୍ଡିଙ୍କ ଇଡତନ୍ ନୁ ଡଲାନ୍ ଦିନ୍ତେ ମୁନେଆସ୍ ମାଡତନ୍ ।

୩

ନିଜାମ୍ତେ ଦାର୍ମାମ୍

^୧ ପେରକେ ଦାଦାନଡି ନୁ ଏଲାସ୍ଯାକି, ପ୍ରବୁନ୍ ତଡ୍ କାଇଲି ମାନନାଙ୍କ ମିଡ୍ ଝେଡକା ମାଡାର୍ । ମୁନେଙ୍କକଞ୍ଜ ବାଡେଏ ଲେକ୍ତାଦ୍ ମିନ୍ଦେ, ଆଦ୍ ମେଣ୍ଡନ୍ୟାମ୍ ମାଡାନଙ୍କ ନାନ୍ ମେଣ୍ଡ ଆଦାନ୍ ମନ୍ ମାଡନ୍, ବାଡେଙ୍କଇକେ ମିୟାଦ୍ ସୁରକ୍ଷା ସେଙ୍ଗେ ଇଦ୍ ସାହାୟ୍ୟ ମାଡିତେ ।

^୨ ବେନଡ୍ ସଡ୍ ପାଡିୟିଦାଗ୍ ମାଇମିନ୍ଦେଡ୍, ବେନଡ୍ ସୁନ୍ନତ ମାଡାନ୍ ସେଙ୍ଗେ ଜିଦ୍ ମାଡିତଡ୍, ଆଝୁ ନେୟକିନ୍ ମାଇଦିଙ୍କ ସାବଦାନ୍ ।

^୩ ମାମ୍ମେ ମୁନେଙ୍କ କଞ୍ଜ ହେଞ୍ଜ୍ତେ ଲେକାମ୍; ଅଡ୍ ଆୟୁୟଡ୍ । ମାମ୍ମେ ପବିତ୍ର ଆମ୍ମାନ୍ ସାହାୟ୍ୟତେ ଇଶ୍ୱରତେ ଉପବାସ୍ ମାଡତୁମ୍ ନୁ କ୍ରିଷ୍ଟ ଜିସୁନ୍ ତଡ୍ କାଇଲି ମିକା ଝେଡକା ଆନନ୍ଦ ମାଡତୁମ୍ । ବାୟୁଦେଡ୍ ରିଡିନିଡି ପରୁ ମାୟାଦ୍ ଆଶେ ଇଲା ।

^୪ ଆଦଲେକାମ୍ ଆଦ୍ ସାରେ ପରୁ ଆଶେ ନେହେତାନାଦ୍ ନା ପାକେ ମାନନେଡ୍ । ଯଦି ବେନ ବାହିଦେ ରିଡିନିଡିତେ ଆଶେ ପରୁ ଗୁରୁଡ୍ ଇଦେପାରୁଡନ୍, ଆଦଲେକାମ୍ ମାଡାନଙ୍କ ନାୟାଦ୍ ଆସର୍ କାରିନ ମିନ୍ଦେ ।

୫ ☆ ନା ଜନମତେ ଆବଦିନେତ୍ ପେରକେ ନାକିଂଙ୍କୁ ସୁନ୍ନତ୍ ଆସ୍‌ମାତ୍‌ତେ । ଜାତିତାଗ୍ ନାନ୍ ଝେରନ୍ ଇଶ୍ରାଏଲିୟ, ବେଞ୍ଜାମିନ୍ ବଂଶତେ ଏବ୍ରୁୟ । ଇହୁଦିନତ୍ ବ୍ୟବସ୍ଥା ପାଲନ୍ ତାଗାଙ୍କୁ ନାନ୍ ଝେରନ୍ ପାରୁଣି ମାତ୍‌ତାନ୍ ।

୬ ☆ ନାୟାଦ୍ ଇର୍ଷାତ୍ ସେଙ୍ଗେ ନାନ୍ କ୍ରିଷ୍ଟିୟାନ୍ ମଣ୍ଡଲିତିଙ୍କୁ ତାତ୍‌ନା ମାତ୍‌ତାନ୍ । ନିୟମ୍‌ତାଦ୍ ଆଜ୍ଞା ପାଲନ୍ ମାତ୍‌କେ ଯଦି ନାରୁଣ୍ଡ ଦାର୍ମାମ୍ ଆଦେ ପାର୍‌ଦତ୍‌ଶ୍ଚ, ଆଲେକେ ନାନ୍ ନିର୍ଦ୍ଦୋଷ୍ ମାତ୍‌ତାନ୍ ।

୭ ବାତେଙ୍କୁକେ ବେନ୍ ସାରେ ବିଷୟ ଲାବ୍‌ତେ ଇଞ୍ଜ ନାନ୍ ହେର୍କା ମାତ୍‌ମାତ୍‌ତାନ୍, ଆଦିଙ୍କୁ ଇଞ୍ଜେ କ୍ରିଷ୍ଟନ୍ ସେଙ୍ଗେ ନାନ୍ କ୍ଷତିତେ ଏର୍କା ମାତ୍‌ତୁନ୍ ।

୮ ମାତର୍ ଆସର୍ ଆୟ୍‌ୟ; ନାୟାଦ୍ ପ୍ରବୁ ଜିସୁ କ୍ରିଷ୍ଟଙ୍କୁ ପୁନ୍‌ନା ସେଙ୍ଗେ ବେନ୍ ସାରେ ଐଶ୍ଵର୍ଯ୍ୟ ଲାବ୍ ମାତ୍‌ତୁନ୍, ଆଦିନ୍ ଲେକାମ୍ ବାଗାତ୍ ସାରେ ବିଷୟତିଙ୍କୁ ନାନ୍ ଇଞ୍ଜେ ଆସର୍ ମାନେମ୍ ଆଦୁତାନ୍ । ଅନ୍ ସେଙ୍ଗେ ନାନ୍ ସାରେ ମିକା ଝିତ୍‌ସ୍‌ତାନ୍ । କ୍ରିଷ୍ଟଙ୍କୁ ଦସ୍‌କି ଆତ୍‌ତାଙ୍କୁ ।

୯ ନୁ ଅନ୍ ତତ୍, ସାରେଲେକାମ୍ କାୟ୍‌ଲାନ୍ ସେଙ୍ଗେ, ବାଗାତ୍ ସାରେ ବିଷୟତିଙ୍କୁ ତଗ୍ ଇଞ୍ଜ ହେର୍କା ମାତ୍‌ମାତ୍‌ତାନ୍ । ବେନ୍ ଦାର୍ମାକ୍‌ତାଦ୍ ବ୍ୟବସ୍ଥା ପାଲନ୍ ତତ୍ ଲାବ୍ ମାତ୍‌ତାଙ୍କୁ ଆଦତେ, ଆଦ୍ ଲେକାମ୍ ବାତେବା ନିଜେତ୍ ଦାର୍ମାକ୍ ନାୟାଦ୍ ଇଲ୍‌ଲେ । ଇଞ୍ଜେ ନାୟାଦ୍ ଦାର୍ମାକ୍ ମିନ୍ଦେ, ଆଦ୍ କ୍ରିଷ୍ଟନାଗେ ବିଶ୍ଵାସ୍ ମାତ୍‌ନାଦିନ୍ ତତ୍ ଦରକିତ୍; ଆଦ୍ ଇଶ୍ଵରତାଗାଙ୍କୁ ଝାଦ୍‌ତେ ନୁ ଆଦ୍ ବିଶ୍ଵାସ୍ ପରୁ ମିନ୍ଦେ ।

୧୦ ଇଞ୍ଜେ ନାୟାଦ୍ ଅଣ୍ଡଦାମ୍ ଇଚ୍ଛା ନାନ୍ ବେଲାନ୍ କ୍ରିଷ୍ଟଙ୍କୁ ପୁନ୍‌ତାନ୍ ନୁ ଅନ୍ ମେଣ୍ଡେ ଝାଦାନ୍ ଶକ୍ତି ଏକେ ମାଡିତାନ୍; ତାଙ୍କୁ ତିପାଲ୍ ବାରେତେ ସାମାନ୍‌ବେଦନା ଏର୍କାମାଡି ତଲ୍‌ତାଗେ ମିକା ଅନ୍‌ଲେକାମ୍ ଆଦତ୍‌ଶ୍ଚ ।

୧୧ ନୁ ତଲ୍‌ତାଗାଙ୍କୁ ମେଣ୍ଡେ ଜିଞ୍ଜେ ଆଦାନ୍ ବରସା ଲାବ୍ ମାଡିତାନ୍ ।

ଲକ୍ଷ ପଡ଼ିୟେତାଗ୍ ମିରିକାତ୍,

୧୨ ନିୟାଦ ପରିତ୍ରାଣ ବେଳାନ୍ ପୁରା ଆସ୍ ଅଦିନ୍ ତଡ଼୍ ଖାଡ଼କି ମିକା କାମ୍ ମାଡ଼ ଆନୁର୍, ନାନ୍ କୃତକାମ୍ ବା ସିଦ୍ ଆଦ୍ ପାର୍ତ୍ତେ ଇଞ୍ଜ କେଲଡ଼୍ । ପୁରସ୍କାର୍ ଦସ୍ କି ଆଦାନଙ୍କ୍ ମିରାନାଗେ ଲାଗେମ୍ । ସ୍ବୟଂ କ୍ରିଷ୍ଟ ନାକିଂଙ୍କ୍ ପଇସ୍ ତାସ୍ ଇଗେ ଖାଟିଡ଼ତନ୍ ।

୧୩ ହୋ ଦାଦାନଡ଼ି ନୁ ହେଲାସ୍, ନାନ୍ ଇଞ୍ଜେ ଆଇନା ଆଦ୍ ପଡ଼ିୟେତାଗ୍ ଏଞ୍ଜନ୍ । ବାତେଙ୍କ୍ ଇକ୍ତେ ଖେରଡ଼୍ ପାଡ଼ିୟିଦାଗ୍ ନାନ୍ ବିନଷ୍ଟ୍ ମାଡ଼ତାନ୍; ପେରକେ ଖିଡ଼ସି ଖାସ୍ ମାନ୍ଦାନ୍ ବିଷୟକିଙ୍କ୍ ମାର୍ଜି, ମୁନେମାନ୍ଦାନ୍ ବିଷୟକିଙ୍କ୍ ଦସ୍ କି ଆଦାନ୍ ସେଙ୍ଗେ ସେନେକ୍ ମାନକର୍ ଆଲ୍ସି ମାଡ଼ତୁନ୍ ।

୧୪ ଆଦିଙ୍କ୍ କ୍ରିଷ୍ଟ ଜିସୁନ୍ ତୋଡ଼ତନ୍ ବେନ୍ ସ୍ବର୍ଗ୍ ଲିଞ୍ଜୁନ୍ ଲାବ୍ ମାଡ଼ାନ୍ ସେଙ୍ଗେ ଇଶ୍ବର୍ ନାକିଂଙ୍କ୍ କାର୍ଜ୍ ତନ୍ ଆଦ୍ ପୁରସ୍କାର୍ ସେଙ୍ଗେ କଣ୍ଡେ ଖାଟି ନାନ୍ ମେଲ୍ତା ପଡ଼ିୟେତାଗ୍ ମିରତାନ୍ ।

୧୫ ମାନାଗେ ବେନଡ଼୍ ଆଦ୍ୟାମିକ ଲେକାମ୍ ପରିପକ୍, ଅଡ଼ାଦ୍ ଇଦ୍ ଲେକାମ୍ ମାନ୍ ଏକେ ମାନ୍ଦାନ୍ଦାଦ୍ ଲେକାମ୍ । ଯଦି ମିୟାଗେ ବେନନାଦ୍ ଖେରେ ଏକେ ମାନ୍ତେ, ଇଶ୍ବର୍ ମିକିଂଙ୍କ୍ ସାରେ ଗଟି ସ୍ବଷ୍ଟେ କେସ୍ ସିଦ୍ତନ୍ ।

୧୬ ଆଦ୍ ବାଡ଼ ଆୟି, ନେଣ୍ଡାଆଇନା ମାନାଡ଼୍ ବେନ୍ ନିୟମ୍ ମାନେମ୍ ଆସ୍ ସ ଖାଡ଼ୁତାଡ଼୍, ଆଦ୍ ଲେକାମ୍ ଇଞ୍ଜେ ମୁନେ ଆଦାନାଦ୍ ଲେକେଡ଼୍ ।

୧୭ ☆ହୋ ଦାଦାନଡ଼ି ନୁ ଏଲାସ୍, ନା ଲେକାମ୍ ମାଡ଼ାବ୍ । ମାମ୍ ମେ ନେହେସ୍ ମାନ୍ଦାନ୍ ଆଦର୍ଶ ଲେକାମ୍ ବେନଡ଼୍ ଆଚରଣ ମାଡ଼ତୁଡ଼୍, ଅଡ଼କିଂଙ୍କ୍ ଉଡ଼ାବ୍ ।

୧୮ ମୁନେଙ୍କ୍ କଞ୍ଜ ନାରଗେ ଦାମ୍ ନାନ୍ ମିକିଂଙ୍କ୍ ଇଦ୍ ଗର୍ କେଡ଼ତାନ୍, ମେଣ୍ଡେ ଇଞ୍ଜେ ମିକା ସାରେଲେକାମ୍ ଲୋତନତେ ଆଦିନ୍ ଲେକାମ୍ ମାଡ଼ତୁନ୍; ନାରଗେ ନିଜେ ନିଜେ ଜିଞ୍ଜେତାଗ୍ କ୍ରିଷ୍ଟନ୍ କୁଶେ ଶତୁନଡ଼୍ ଆଚରଣ ମାଡ଼ତୁଡ଼୍ ।

୧୯ ନରକତାଗ୍ ଅଡ଼ାଦ୍ ଜିଞ୍ଜୁନ୍ତେ ସାରେ ଗଟେମ୍ ଆଡ଼ତାଙ୍କ୍ ଆଡ଼ୁଡ଼ତେ, ବାତେଙ୍କ୍ ଇଡ଼କେ ମେନ୍ଦୁଲ୍ତେ ଆସେତଡ଼୍ କେ ଅଡ଼ାସ୍ତୁ ଦେୟାକ୍ । ବାତେଏ ସିଗ୍ତାଉ, ଅଡ଼୍ ଆଦିନ୍ ସେଙ୍ଗେ ଗର୍ବ ମାଡ଼ିତଡ଼୍;

ମାତର ସଂସାର ବିଷୟରେ ସେଙ୍ଗେ ଅତ୍ରିନ୍ତେ ମାଡ଼ିତଡ଼ ।

^{୨୦} ଅଣ୍ଟ ବାଡ଼ିଆଇ, ମାନାଡ଼ ସ୍ୱର୍ଗ ରାଜ୍ୟରେ ନାରୁଡ଼ । ସ୍ୱର୍ଗତାଗାଙ୍କ ମାନାଡ଼ ଡ୍ରାଣକର୍ତ୍ତାଙ୍କ ପ୍ରଭୁ ଜିସୁଙ୍କ କ୍ରିଷ୍ଟନାଦ ଖାଦାନାଦିଙ୍କ ମାନାଡ଼ ଆଗ୍ରତେ ପ୍ରତିକ୍ଷା ମାଡ଼ୁମ୍ ।

^{୨୧} ବେନ୍ ଶକ୍ତି ଅଣ୍ଟ ସାରେ ବିଷୟତିଙ୍କ ନିଜେତ୍ ବଶିବୃତ ମାଡ଼େ ପାରତନ୍, ଆଦ ଶକ୍ତି ଗ୍ରହନ୍ ମାଡ଼ି ଅଣ୍ଟ ମାନ୍ ଦୁର୍ବଲ୍ ନାୟାଦ୍ ମୋହୁଲ୍ତିଙ୍କ ଅନାଦ୍ ଗୌରବମୟ ମୋହୁଲ୍ ଲେକାମ୍ ମାଡ଼ିତନ୍ ।

୪

ଗର୍ ନୁ ଶିକ୍ଷା

^୧ ପ୍ରିୟ ଦାଦାନଡ଼ି ନୁ ଏଲ୍ୟାସ୍, ମିକିଂଙ୍କ ଉଡ଼ାନ୍ ସେଙ୍ଗେ ନାନ୍ ବେସର୍ ଖେଡ଼କେ । ମିକିଂଙ୍କ ଆସ୍ ନାୟାଦ୍ ବେସର୍ ଖେଡ଼କେ । ମିଇ ସେଙ୍ଗେ ନାୟାଦ୍ ବେସର୍ ଆଗେ । ସହଜ୍ ରକମ୍ ଦାଦାନଡ଼ି ନୁ ଏଲ୍ୟାସ୍, ନାୟାଦ୍ ଶିକ୍ଷା ଲେକାମ୍ ପ୍ରବୁନାଗେ ମାଞ୍ଜିମିକା ବାଦକାଟ୍ ।

^୨ ଇୟଦିଆ ନୁ ସୁନ୍ଦ୍ରକିଙ୍କ ନାୟାଦ୍ ଅନୁରଦ୍, ଆସ୍ତ୍ର ଇଶ୍ୱରତେ କଣ୍ଡେତେ ହେଲାଡ଼ ଲେକାମ୍ କାୟଲି ମାନି ।

^୩ ହୋ ନା ବିଶ୍ୱାସତେ ପାଡ଼ିଯିମାଡ଼ାନଡ଼ି ! ମିକିଂଙ୍କ ମିକା ନାୟାଦ୍ ନିବେଦନ୍, ଇ ହେଲାସ୍ କିଙ୍କ ସାହାଯ୍ୟ ମାଡ଼ାଟ୍, ବାତେଙ୍କଇଡ଼କେ ଇଡ଼ କ୍ଲେମେନ୍ସ ନୁ ନା ମେଣ୍ଡେବାଗାଡ଼ ତଡ଼ଦେନଡ଼, ତଡ଼ ସୁସମାଚାର୍ ପ୍ରଚାର ପାଡ଼ିଯିବାଗ୍ ଗାଟି ତିପାଲ୍ ମାଡ଼ି ନାକିଂଙ୍କ ସାହାଯ୍ୟ ମାଡ଼ତଡ଼ । ଇଡ଼ାସ୍ତ୍ର ପେଦେରି ଇଶ୍ୱରତେ; “ଜୀଝେ ବଇତାଗ୍,” ଲେକାମିନ୍ଦେ ।

^୪ ପ୍ରଭୁନ୍ ତଡ଼ କାଇଲି ମାନ୍ନାଙ୍କ ସାରେଦାମ୍ ଖେଡ଼କ୍ ମାଡ଼ାଟ୍ । ମେଣ୍ଡେନ୍ଦାମ୍ କେଡୁତାନ୍, “ଖେଡ଼କ୍ ମାଡ଼ାଟ୍ ।”

^୫ ସାରେତଡ଼ ତଡ଼ ସାଏତେ ବ୍ୟବହାର ମାଡ଼ାଟ୍ । ପ୍ରବୁନାଦ୍ ଖାଦାନ୍ ଦିନା ଗାରରେ ଖାସ୍ ହେଉଦୁଡ଼ ।

^୬ ବାତେବା ବିଷୟରେ ତିନ୍ତେ ଆୟମାଟ୍ ! ବାତେଙ୍କଇକେ ମିକିଂଙ୍କ ବାଡ଼ ଦରକାଡ଼, ଆଦ ପ୍ରାର୍ଥନାତାଗ୍ ଇଶ୍ୱରତିଙ୍କ ତାଲକାଟ୍ । ମେଣ୍ଡେ ପ୍ରାର୍ଥନା ମାଡ଼ାନ୍ ଖେଲେ ସାରେଦାମ୍ ହୃଦୟତେ ଦନ୍ୟବାଦ୍ ତଡ଼, ମିୟାଦ୍ ସାରେ ନିବେଦନ୍ ଇଶ୍ୱରତିଙ୍କ କେଲାଟ୍;

୭ ଆଲେକେ ନାରୁନାଦ୍ ଡଲାନାଦ୍ ଅଗମ୍ୟ ଇଶ୍ବରତେ ଶାନ୍ତି କ୍ରିଷ୍ଟ ଜିସୁନାଦ୍ ସାହାଚର୍ଯ୍ୟତେ ମିୟାଦ୍ ହୃଦୟ୍ ନୁ ମାନଦିକ୍ ସୁରକ୍ଷା ମାଡିତେ ।

୮ ତାନ୍ପେକେ, ଦାଦାନଡି ନୁ ଏଲ୍ଲାସ୍, ବେନ୍ ସାରେ ବିଷୟ ସାୟେ ନୁ ପ୍ରଶଂସ୍ୟ, ବାଡ୍ ସାରେ ସଡ୍ ନୁ ମହଡ୍, ବାଡ୍ ଟିକ୍, ବିଶୁଦ୍ଧ, ପ୍ରୀତିକର ନୁ ସମ୍ମାନତଡ୍, ଆଦ୍ ସାରେ ମିୟାଦ୍ ଚିନ୍ତେତେ ବିଷୟ ଆୟି ।

୯ ମିଡ୍ ବେନ୍ ସାରେ ବିଷୟ ନାୟାଗାଙ୍କ୍ ଶିକ୍ଷା ମାଡ୍ତିଡ୍, ପାଏମ୍ ଆଡ୍ତିଡ୍, ନୁ କେଞ୍ଜିଡ୍, ନୁ ନାୟାଗ୍ ଉଡ୍ତିଡ୍ ଆସୁସାରେ ମାଡ୍ଡାଟ୍, ଆଗେ ଶାନ୍ତିଦାତାଲ୍ ଇଶ୍ବର ମିୟାଦ୍ ତଡ୍ ଆଦତଣ୍ ।

ଦାନ ସେଙ୍ଗେ ଦନ୍ୟବାଦ୍

୧୦ ପ୍ରବୁନ୍ ତଡ୍ କାଇଲି ମାୟାନ୍ ଜିଝୁନ୍ ଯାପନ୍ ମାଡ୍ଡାନ୍ ଝେଲେ, ନାୟାଦ୍ ଝେଡ୍ କ୍ ଯେ, ମିଡ୍ ନା ସେଙ୍ଗେ ମାନ୍ ମାଡ୍ତିଡ୍ । ନାରଗେ ଦିନାମ୍ ପେରକେ ମେଣ୍ଡୁନଦାମ୍ ଇଦ୍ ନିର୍ଦ୍ଦଶନ ତଅଡ୍ତିଡ୍ । ନାନ୍ କେଲନ୍ ଯେ, ମିଡ୍ ଇଗେମିକା ନା ସେଙ୍ଗେ ମେଣ୍ଡେ ମାନ୍ ଆୟ୍‌ଝେ ମାଡ୍ତିଡ୍, ମାତର୍ ଆଦ୍ କେତାନଙ୍କ୍ ସୁୟଗ୍ ପାଏମ୍ ଆୟ୍‌ଝେ ମାଡ୍ତିଡ୍ ।

୧୧ ନାନ୍ ନିଜେତିଙ୍କ୍ ଅବହେଲିତ ଆଲ୍‌ସି ଇଦ୍ ଗର୍ କେଲନ୍, ବାତେଙ୍କ୍‌ଇଡ୍‌କେ ନାୟାସୁ ବାତା ମିନ୍ଦେ, ଆସର୍‌ତିଙ୍କ୍ ସନ୍ତୁଷ୍ଟ ଆଦାନଙ୍କ୍ ନାନ୍ ଶିକ୍ଷା ମାଡ୍ଡୁନ ।

୧୨ ଅବାଦ୍ ଆୟି, ନାରଗେ ଆୟି, ବେଲ୍‌ମେଣ୍ଡେ ଆଦ୍ ମୁନେ ମାଡ୍ଡାଙ୍କ୍ ଆଦତେ, ଆଦ୍ ନାନ୍ ପୁଡ୍‌ତାନ୍ । ଆଦିଙ୍କ୍ ବେଦ୍ ସମୟ୍‌ତେ, ବେଦ୍ ଲେକାମ୍ ପରିସ୍ଥିତିତେ, କାର୍‌ଝିନ୍ ଝେଲେ ବେଲ୍‌ମାନ୍, ତଲେ ନିଶ୍ଚିତେ ଝେଲେ ମିକା ଆଦେଲେକାମ୍, ଅବାଦ୍ ଝେଲେ ମିକା, ମେଣ୍ଡେ ନାରଗେ ମାୟାନ୍ ଝେଲେ ନାନେ ସାରେଦାମ୍ ସନ୍ତୁଷ୍ଟ ।

୧୩ ନା ଶକ୍ତିଦାତା କ୍ରିଷ୍ଟନ୍ ସହାୟତାତେ ନାନ୍ ସାରେକିଟି ମାଡ୍ଡେ ପାର୍‌ତାନ୍ ।

୧୪ ଆଗେକ୍ ମିକା ନାୟାଦ୍ ତିପାଲ୍ ସମୟ୍‌ତେ ନାକିଂଙ୍କ୍ ତଡ୍ ଆସ୍ ମିଡ୍ ମହଡ୍ ପାଡ୍‌ୟି ମାଡ୍ତିଡ୍ ।

୧୫ ହୋ ପିଲିପିନ୍ସ ଦାଦାନଡି ନୁ ଏଲ୍ଲାସ୍, ମିୟାଦ୍ ସାୟେ ଏକ୍ ମାନ୍‌ତେ, ବେଲ୍‌ମାନ୍ ସୁସମାଚାର୍ ପ୍ରଚାର୍ ଆରାମ୍ ମାଡ୍ଡାନ୍ ଝେଲେ,

ନାନ ବେସୁଙ୍କ ମାସିଦୋନିଆ ଝିଡ଼ସ୍‌ତାନ, ମାତର ମିୟାଦ ମଣ୍ଡଳି ନାକିଂଙ୍କ ସାହାଯ୍ୟ ମାଡ଼ିମାଡ଼ତେ, ମାତର ମିଡ଼ ନାୟାଦ ଲାବ ନୁ କ୍ଷତିତେ ବାଗିଦାର ଆସମାଡ଼ତିଡ଼ ।

୧୭ ✠ନାନ ଥେସଲନିକୀତାଗ୍ ମାନ୍ଦାନ୍ ଖେଲେ ମିଡ଼ ନାର୍‌ଗେଦାମ୍ ନା ଗାର୍‌ରେ ଦରକାର ଆସମାନ୍ଦାନ୍ ସାହାଯ୍ୟ ରହସ୍ ମାଡ଼ତିନ୍ ।

୧୭ ଇକ୍‌କେ ମିୟାଗାଙ୍କ ମାତର ଦାନ ଗ୍ରହନ୍ ମାଡ଼ାନଙ୍କ ନାନ ଇଚ୍ଛା ମାଡ଼ନ୍; ଇଦିନ୍ ସେଙ୍ଗେ ମିଡ଼ ବେଲାନ ଗାଟି ନାର୍‌ଗେ ଲାବତଡ଼ି ଆୟ୍‌ମୁର୍, ଇଦ୍ ନାୟାଦ ଇଚ୍ଛା ।

୧୮ ମିୟାଗାଙ୍କ ନାନ ପାଏମଆସ୍ ମାନ୍ଦାନ୍ ସାରେ ଦାନ ସେଙ୍ଗେ ପ୍ରାପ୍ତି ସ୍ୱୀକାର ମାଡ଼ତୁନ୍ । ଏପାପ୍ରତିଡ଼ତେ କାୟ୍‌ଦାଗ ମିଡ଼ ରହସ୍ ମାନ୍ଦାନ୍ ଦାନ ନାୟାଦ ସାରେ ଅବାବ୍ ପୁରା ମାଡ଼ତୁନ୍ । ଆଦ୍ ଇଶ୍‌ବରତେ ଡକେଶ୍ୟତେ ଇଡ଼ତେ ସାୟେଡ଼ ଗାବ୍ ପୁଜା ସାମାନ୍ ନୁ ଅଣ୍ଟ ଗ୍ରହଣ ମାଡ଼ାନାଦ୍ ବା ସାୟେଡ଼ାଦ୍ ବଲିଦାନ୍ ଲେକାମ୍ ।

୧୯ କ୍ରିଷ୍ଟନ୍ ତଡ଼ ନା ଇଶ୍‌ବର ଅନାଦ୍ ନାର୍‌ଗେ ଆଗ୍ ବାଦ୍‌ତେ ମିୟାଦ ସାରେ ଆଦାନାଦ୍ କେପ୍‌ସିଦ୍‌ତଣ୍ଟ ।

୨୦ ଯୁଗ୍‌ଯୁଗ୍ ବାବାଲ୍ ଇଶ୍‌ବରତେ ଗୌରବ୍ ଆୟି । ଆମେନ୍ ।

ମାଡ଼େଙ୍କତାଦ୍ ନମସ୍କାର

୨୧ କ୍ରିଷ୍ଟ ଜିସୁନ୍ ପେଦେରତେ ଆଗେ ମାନ୍ଦାନ୍ ସାରେତଡ଼ ସାଦୁନଡ଼, ନମସ୍କାର ମାଡ଼ତୁନ୍ । ନା ସାଙ୍ଗେତେ ମାନ୍ଦାନ୍ ଇଦ୍ ପଡ଼ିୟେତେ ଦାଦାନଡ଼ ନୁ ଏଲ୍‌ୟାସ୍ ମିଡ଼ ସାରେତଡ଼କ୍ ନମସ୍କାର ମାଡ଼ତୁନ୍ ।

୨୨ ଇଗେ ମାନ୍ଦାନ୍ ଇଶ୍‌ବରତେ ନାରୁଡ଼, ବେନଡ଼, ସମ୍ପାବ୍ କାଈସରତେ ପ୍ରାସାଦ୍‌ତାଗ୍ ମାନ୍ଦାନ୍ ସାଦୁନଡ଼, ମିକିଂଙ୍କ ନମସ୍କାର ମାଡ଼ତୁଡ଼ ।

୨୩ ପ୍ରବୁ ଜିସୁ କ୍ରିଷ୍ଟନାଦ୍ ଅନୁଗ୍ରହ ମିଈ ସାରେତଡ଼ ପରୁ ଆୟି । ଆମେନ୍ ।

ପୁନାବ୍ ଆର୍ବ୍
The New Testament in the Koya language of India:
ପୁନାବ୍ ଆର୍ବ୍ (Bible)

copyright © 2020 The Word for the World International and Koya Translation Samithi, Malkangiri, Odisha

Language: (Koya)

Contributor: The Word for the World South Asia

ପୁନାବ୍ ଆର୍ବ୍
ପୁନାବ୍ ନିୟମ୍ , 2020

The New Testament in Koya Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

72ff5787-bb80-584b-a1a0-0acd8a2fefae